



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DCCCLXXII. ad annum DCCCCIX.

Parisiis, 1644

Epistola CLXXXVIII. Ioannis Papae VIII. Ad Anselmvm Episcopvm
Lemovicensem. Non separandum virum ab vxore, qui filium suum
necessitate vrgente baptizavit.

urn:nbn:de:hbz:466:1-15967

EPISTOLA CLXXXVIII.

IOANNIS PAPÆ VIII.

AD ANSELMVM EPISCOPVM LEMOVICENSEM.

Non separandum virum ab vxore, qui filium suum
necessitate vrgente baptizauit.

Anselmo episcopo Lemouicinæ ecclesiæ.

AD limina beatorum Petri & Pauli apostolorum princi-
pum hic præfens homo, nomine Stephanus orationis
causa veniens, nostro præfultui suggerendo innotuit,
quod filium suum in extremo vitæ positum, nec baptisma-
tis vnda lotum, absentia scilicet sacerdotum necessitate
cogente baptizasset, eumque ipse propriis manibus reti-
nendo suscepisset, atque pro huius rei negotio notitiæ
tuæ patefacto, reuerentia tua, quasi zelo rectitudinis fla-
grans, præfatum hominem a sua iudicauerit coniuge separandum.
Quod fieri nullatenus debet, dicente scriptura
a Deo iunctam viro esse vxorem, & *quod Deus coniun-*
xii homo non separet. Vnde & Dominus in euangelio ne-
minem posse dimittere vxorem suam, nisi causa fornica-
tionis apertissime iubet. Quapropter & nos, tantæ aucto-
ritatis iussione præcipue freti, dicimus omittendum esse,
& inculpabile iudicandum, quod necessitas intulit.
Nam baptizandi hoc opus etiam laicis fidelibus, iuxta cano-
nicam sanctionem, si necesse fuerit, facere libere conceditur.
Vnde si prædictus genitor filium suum corpore morientem
aspiciens, ne animam morte perpetua pereuntem dimitteret,
sacri baptismatis vnda lauit, vt eum de potestate auctoris
mortis & tenebrarum eriperet, & in regnum Christi iam
regeneratum indubitanter mitteret, bene fecisse laudatur.
Et idcirco cum sua vxore sibi iam olim legitime sociata
impune, quamdiu vixerint, iudicamus manere coniunctum,
nec ob hoc contra præfatas auctoritates diuinas aliquatenus
separari debere. Data VII. die mensis Iunii, indictione XII.

30. quest. 1.
Ad limina.

Prou. 19.
iuxta 70.
Math. 19.